

06/11/2003

Thaksin yakin kemampuan Pak Lah

KANGAR: Perdana Menteri Thailand, Thaksin Shinawatra menyifatkan pelantikan Datuk Seri Abdullah Ahmad Badawi sebagai Perdana Menteri membuktikan keyakinan dan kepercayaan tinggi rakyat terhadap kepemimpinan Abdullah.

"Kelebihan yang dimiliki Abdullah mampu menjadikan Malaysia terus menikmati keamanan dan kemakmuran, sekali gus membawa keamanan di rantau ini," katanya dalam satu kenyataan yang difaks ke pejabat The New Straits Time Press (M) Berhad (NSTP), di sini semalam.

Thaksin mewakili kerajaan Thailand serta barisan menteri Kabinetnya mengucapkan tahniah kepada Abdullah yang dilantik sebagai Perdana Menteri pada Jumaat lalu.

"Thailand menghargai segala jasa dan bantuan yang diberikan Malaysia. Bantuan ini menjadikan Thailand dan Malaysia lebih rapat dan saling memerlukan.

"Kami berharap di bawah kepemimpinan Abdullah, hubungan Malaysia-Thailand akan terpelihara dan lebih erat pada masa depan," katanya.

Thaksin juga mempunyai keyakinan tinggi terhadap kemampuan Abdullah menerajui Malaysia selepas era Dr Mahathir.

Beliau berkata, pengalaman sebagai diplomat dan menteri Kabinet sejak sekian lama memberi banyak kelebihan kepada Abdullah untuk membawa Malaysia terus cemerlang dalam pelbagai bidang.

"Saya yakin di bawah kepemimpinan Abdullah yang mempunyai pengalaman luas sebagai ahli politik dan bekas diplomat, Malaysia akan terus maju dan makmur di samping mempunyai masyarakat berbilang kaum yang saling memahami dan hormat menghormati.

"Malah, di bawah pimpinan Abdullah, saya yakin hubungan Malaysia-Thailand akan terus erat dan diperkuatkan dengan sikap saling memahami antara kedua-dua negara," katanya.